

Maikito Croes ta bolbe bira Rey di Dande den un festival extraordinario pero tambe decepcionante



PARADERA- Un biaha mas e festival di Dando y Tipico a bira un exito grandi, caminda na salida di solo diasabra mainta, a corona Maikito Croes como Rey di Dande 2002.

Apesar di tur esfuerso y insistencia di e organizadornan



pa cuminsa e festival pa 7' or di anochi, tabata pa banda di 9.15 di anochi cu e prome grupo a cuminsa actua, dilanti un publico cu no tabata mucho grandi.

Segun e oranan tabata pasa, Club Caiqueto a cuminsa yena mas y pa banda di mei anochi tabatin e publico mas grandi pero segun e oranan di madrugada tabata pasando, e publico a bolbe desminui.



Hasta algun participante no por a wanta mas y a dicidi di regresa nan cas pa busca caba y si nan cai den premio, regresa e ora pa e centro pa ricibi e honor.

Realmente e momento a yega pa organizadornan busca un forma na evalua e gruponan,

evalua e composicionnan y trata di evita cu tin participante ta djis inscribi pa un 'kick' y nada mas, sin cu nan composicion ta un aporte na e cultura musical di nos pais.

No mester lubida cu tin un publico cu ta paga pa bin mira e show aki, cu kier mira espectáculo y na momento cu tin gruponan cu no ta bon prepara, cu tin cantantenan cu ta lubida nan cancion, cu tin participantenan cu ta subi escenario bao di influencia di alcohol, nan ta faltando respet pa e fanaticada di e festival aki.

Caba te den oranan tempran di mainta no ta un problema si e calidad di composicionnan y calidad di e dandenan ta riba un nivel halto, ya cu placer e fanaticonan lo keda pa mira esaki, pero loko ta kibra e ambiente pa gruponan cu no ta bon prepara y cantantenan cu no ta den bon condicion pa canta of pa subi escenario.

Lo ta na su lugar pa organizadornan bai over na evalua e participantenan di tur

aña, y mira cual ta bin na remarke pa regresa y cual ta e gruponan cu simplemente no ta cumpli cu e exigencianan pa duna un aporte real na musica di nos pais.

No ta algun banda nobo so a muestra malo, pero tin bandanan renombra cu a duna muestra di no a prepara mucho, mientras cu tin cantantenan venterano cu tambe a laga di desea pa falta di preparacion.

Dandeta algo special, dando ta un specialidad cu ta rekeri preparacion y seriedad y na momento cu esaki no ta e caso, automaticamente e dande tambe lo zona malo.

Maikito Croes a presenta cu Grupo di Betico y a presenta un aspecto musical di dandoi totalmente diferente, e variacion sin igual cu a zona espectacular.

Enberdad por bisa cu no ta e dande original pero mescos cu cualquier otro tradicion, dande tambe mester ta habri pa cambianan cu ta haci e musica aki algo mas special y bunita.

